

# Dad A fin Z cun il nov cusseglier guvernativ

Christian Rathgeb entschaiva oz sia lavur

DA GION NUTEGN STGIER / ANR

■ **Christian Rathgeb è enconuscent en emprima lingia per sias activitads politicas, sco anteriur president dal cussegl grond, sco president da Cuira Turissem e suenter ils 29 da schaner 2012 è el er cusseglier guvernativ.** Oz ha il nov commember da la regenza grischuna ses emprim di da lavur. Però davos quel carstgaun stat er ina persuna sco ti ed jau. Al nov cusseglier guvernativ avain nus dà tar mintga bustab da l'alfabet in chavazzin che ha da far pauc cun politica.

**Auto:** Il traffic individual ha per mai sco Grischun ina gronda impurtanza. Sche jau na sun betg per via cun il bus ubain cun la viafier sun jau sco ami da Golf sin viadi cun mes Golf.

**Banchets:** Pli gugent vegn jau ad in ensolver da purs ubain ad in ensolver da muntogna sco per exempel a Tignas tar Rosmarie e Christoph Burri.

**Chatscha:** Las cornas da capricorn che la regenza grischuna ha dà sco regal tar la tscherna sco president dal cussegl grond han tar mai in post d'onur. Jau sun dentant nagin chatschader, giaud però tratgas da selvachina.

**Departament:** Jau ma legr sin mes departament e sin la responsabladad per quel.

**Euro:** In uffant che fa blers quitads.

**Famiglia:** La famiglia stat per mai en il



**Christian Rathgeb entschaiva oz sco cusseglier guvernativ. Cun el avain nus fatg ina intervista betg uschè seriusa.**

FOTO G. N. STGIER

center ed jau giaud mintga minuta en il ravugl da mia famiglia.

**Gasetta:** Jau stim d'avair bain marvegl la gasetta e jau legel las gasettas dal di grischunas pil pli avant las 05.30.

**HCD:** Ina ensaina sportiva dal Grischun. Simplamain topp!

**Italia:** Senza Berlusconi a la testa vai segir puspè ensi .

**Jumbo Jet:** Jau preferesch la Viafier retica ubain mes auto.

**Kiosk:** En media duas giadas en in onn vom jau al kiosk per cumprar insatge.

**La Quotidiana:** Tutga tar mia lectura e simplifitgescha d'emprender rumantsch.

**Motor:** Ina miracla tecnica. Per cletg datti persunas che chapeschan insatge

per reparar ils tocs defects. Jau appartegn betg tar quellas persunas.

**Novitads:** Deplorablmain sai jau darar guardar quellas la saira. Jau ma orientesch cun leger la gasetta.

**Origen:** Cultura sin in nivel fitg aut. In cas da fortuna per Surses e per il Grischun.

**Prosecco:** Sche in vul metter mai tempo-

rar ord funcziun lura sa el far quai cun pauc da quella substanza.

**Qualitad:** Mes motto è: «Cun prestaziun, perseveranza e plaschair tar il success». Per ina buna prestaziun ha er da constar la qualitad, quai vala cunzunt tar il turissem.

**Rosas:** Regal jau davairas memia pauc.

**Scribent:** Creaders da cultura che jau admir.

**Tempo:** Tempo sulet na porta nagin success, però en la politica vai savens memia plaun fin ch'in problem è schlià.

**UBS:** Ina gronda banca svizra che tutga tar noss lieu da bancas e che procura per ina stabilitad da l'economia naziunala. Jau dentant sun il client cuntent da la Banca chantunala.

**Vestgadira:** Il pli gugent port jau jeans ed in t-shirt. En l'avegnir vegn mes vestgi da lavur dentant ad esser in auter.

**Walkman:** Anc avain nus nagin en noss perchasa.

**Xamax:** In club da ballape cun bler potenzial.

**Yamaha:** Construescha admirabels motos. Fin che mes uffants èn creschids vegn jau be a siemiari dad in tal moto.

**Zermatt:** Sch'i na dess betg lieus turistics en noss chantun lura savess jau tuttina s'imaginar d'ir ina giada er a Zermatt cun skis.